

PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS

---

**PERTANYAAN** : **JAWAB LISAN**

**DARIPADA** : **TUAN SYED SADDIQ BIN SYED ABDUL RAHMAN [MUAR ]**

**TARIKH** : **29 JULAI 2020 (RABU)**

**SOALAN**

Minta **MENTERI BELIA DAN SUKAN** menyatakan komitmen dan usaha dalam Dasar Belia 30 yang dirancang Kementerian untuk memperkasakan golongan belia 18 tahun hingga 30 tahun selaras dengan usaha merendahkan had umur belia kepada 30 tahun.

**JAWAPAN**

Tuan Yang di-Pertua,

1. Dasar Belia Malaysia (DBM) yang dilancarkan pada tahun 2015 memberikan penumpuan kepada aspek memperkukuhkan dan menyerlahkan potensi modal insan belia sebagai pemacu pembangunan strategik negara pada masa hadapan berpandukan Perlembagaan Persekutuan dan Rukun Negara. Penurunan had umur belia ini adalah berlandaskan keperluan meremajakan kepimpinan belia, mendayaupayakan orang muda, negara muda dan selari dengan takrifan umur di peringkat antarabangsa. Selaras dengan had umur ini, Kementerian Belia dan Sukan (KBS) telah mengambil langkah proaktif ke arah memperkasakan golongan belia.

2. Pada tahun 2019, Parlimen telah meluluskan Rang Undang-Undang Pertubuhan dan Pembangunan Belia [Akta 668] Pindaan 2019. Secara rasionalnya, pindaan Akta 668 ini antara lain melibatkan penurunan had umur belia kepada 30 tahun; menetapkan had umur pertubuhan belia yang melibatkan pemegang jawatan dan ketua pertubuhan belia kepada 18 hingga 30 tahun dan mengehadakan tempoh ketua pertubuhan belia selama 4 tahun sahaja. Ia adalah selaras dengan tafsiran 'Belia' di bawah DBM.

3. Justeru itu, dalam usaha membantu ke arah memperkasa kepimpinan baru di bawah umur 30 tahun, KBS telah melaksanakan sesi taklimat bersama Pengarah-pengarah Jabatan Belia dan Sukan Negeri (JBSNg) dan Institusi Latihan Kemahiran Belia dan Sukan (ILKBS) seluruh negara pada 15 Julai 2019 bagi memberikan kefahaman berkaitan pindaan Akta 668 serta bersedia membuat hebahan kepada pemegang taruh khususnya kumpulan anak muda di peringkat negeri dan komuniti.

4. KBS juga telah melaksanakan Sesi Libat Urus Akta Pertubuhan Belia dan Pembangunan Belia bersama YAB Menteri Besar/ Ketua Menteri dan Agensi/Jabatan di bawah KBS pada 7 November 2019. Sesi ini bertujuan memberikan penerangan berkenaan dengan pindaan akta ini secara keseluruhan dan memudah cara proses-proses transisi kepimpinan pertubuhan belia di peringkat negeri. Dalam pada itu, pihak KBS juga sedang mendapatkan pendirian Kerajaan Negeri ke atas pindaan Akta 668 sebelum akta ini berkuat kuasa pada 1 Januari 2022.

5. Dengan pelaksanaan program-program yang mengkhususkan kepada kepimpinan dan sosio ekonomi belia, ia secara tidak langsung akan dapat mempercepatkan proses kematangan dan memantapkan proses pembangunan belia kerana belia merupakan sumber dan aset negara. Justeru itu, belia akan lebih bersedia untuk menjalankan tanggungjawab sebagai pengundi seawal umur 18 tahun.

Sekian, terima kasih.